

# Aset wakaf belum diterokai sepenuhnya

BERTA HARIAN 21/4/2023 M/S. 26

Aset wakaf di Malaysia dianggarkan bernilai lebih RM1.3 trilion, namun belum diterokai sepenuhnya untuk memacu pembangunan sosioekonomi negara.

Pengerusi Suruhanjaya Sekuriti Malaysia (SC), Datuk Seri Dr Awang Adek Hussin, berkata potensi besar wakaf yang belum diterokai itu menyediakan peluang kepada mereka yang ingin melabur dalam instrumen atau produk berkaitan wakaf.

“Berdasarkan statistik Yayasan Wakaf Malaysia dan Jabatan Wakaf, Zakat dan Haji (JAWHAR) di Jabatan Perdana Menteri, hanya 13 peratus atau kira-kira 30,000 hektar tanah wakaf di negara ini dimajukan dan secara tradisinya diperuntukkan kepada institusi atau sekolah agama.

“Kadar penggunaan yang rendah menunjukkan potensi besar wakaf yang belum diterokai dalam memangkin pembangunan sosioekonomi, selain pelaburan yang berpotensi,” katanya ketika menyam-

paikan ucapan pada Persidangan Pasaran Modal Islam dan Wakaf di Kuala Lumpur, semalam.

Persidangan dirasmikan oleh Menteri di Jabatan Perdana Menteri (Hal Ehwal Agama), Datuk Mohd Na'im Mokhtar.

Yang turut hadir, Pemegang Anugerah Diraja Kewangan Islam 2022, Tan Sri Dr Mohd Daud Bakar dan bekas Pengerusi FELDA, Tan Sri Idris Jusoh.

Awang Adek berkata, nilai aset wakaf di seluruh dunia dianggarkan berjumlah AS\$100 bilion (RM453.96 bilion) hingga AS\$1 trilion (RM4.54 trilion).

Katanya, anggaran itu menjadikan kewangan sosial Islam sebagai sumber pembiayaan yang berpotensi untuk menangani jurang pembiayaan kemampunan, yang dianggarkan lebih daripada AS\$1.7 trilion (RM7.72 trilion) setiap tahun.

“Menyedari kesan positif wakaf, SC mula mempromosikan pembangunan wakaf menerusi pasaran modal Islam dengan menerbitkan

sebuah buku bertajuk ‘Aset Wakaf: Pembangunan, Tadbir Urus dan Peranan Pasaran Modal Islam’ pada 2014.

“SC juga melancarkan Rangka Kerja Sukuk Pelaburan Mampuan dan Bertanggungjawab (atau Rangka Kerja Sukuk SRI). Rangka kerja ini mengiktiraf dan memajukan pembangunan wakaf sebagai projek yang layak untuk terbitan Sukuk SRI.

“Ini diikuti dengan keluaran Pelan Tindakan Pengurusan Dana dan Kekayaan Islam (IFWMBP) pada 2017, yang menggariskan strategi SC dalam mempromosikan pembangunan aset wakaf melalui skim pelaburan kolektif Islam,” katanya.

## Kerjasama lebih besar

Bagi melancarkan lagi strategi itu, beliau menjelaskan, SC memperkenalkan Rangka Kerja Dana Bercirikan Wakaf (Rangka Kerja WQ-FF) yang membolehkan pelabur menyalurkan sebahagian atau

semua dividen daripada unit amanah dan dana borong kepada projek amal atau kebajikan dalam bentuk wang tunai.

“Tahun lalu, angka kerja ini sudah diperluaskan untuk memasukkan Amanah Pelaburan Hartanah Islam (REIT) dan ETF Islam, untuk memperdalam dan meluaskan lagi pilihan produk dalam segmen ini.

“Kami gembira dengan perkembangan setakat ini. Ia menunjukkan Rangka Kerja WQ-FF dapat mempromosikan kerjasama yang lebih besar antara Syarikat Pengurusan Dana Islam (IFMC) dan Majlis Agama Islam Negeri.

“Terdapat peningkatan dalam usaha semua pihak dalam meneroka dan mengenal pasti potensi pembangunan aset wakaf,” katanya.

Awang Adek berkata, sejak pelancaran Rangka Kerja WQ-FF, sejumlah enam dana berasaskan wakaf diperkenalkan dengan dana agregat yang diperoleh setakat Disember 2022 berjumlah RM46.7 juta.